

揭曼碩詩集

1475
39



門
38
1432

道光丁未鐫

揭曼碩詩集

正月十二日
黃尊師高軒觀
海山仙館叢書

昭和十五年
十一月二日
購求

門 1 9
號 1475
卷 39

海山仙館叢書

揭曼碩詩集

卷之二

揭曼碩詩目錄

卷之一

臨川女

夏五月武昌舟中觸目

張君壽先生鵠山隱居

送趙履道虞叔常還江右

寄題九江義門陳氏壽安堂

正月十二日尋盧學士船至漢口留詩為別

黃尊師高軒觀鵝因留宿

衡山縣曉渡

題王山仲所藏瀟湘八景圖卷走筆作八首

以事覲如武昌發臨川

女兒浦歌

送尹十六善叟謁告歸茶陵會葬賢兄處士十韻

送黃五舅得武陵校官還辰州寓居省侍

貧交行

曉坐張先生朝陽軒

別武昌

南康夜泊聞廬阜鐘聲

春日雜言七首

夢兩雛

夢武昌

遊麻姑山五首

并序

盧學士奉旨南祀海嶽繇鍾陵相別聞尙畱會稽

有懷奉寄

病夜

得程翰林揚州消息

歸故園新居落成後作

山行

寄題馮掾東臯園亭

宿梁安峽夢故室有感時還盱江

送趙仲遠赴甌寧

山莊晚立有懷舍姪沆督穫臨川

哭王十良仲

雨述三篇

春莫閒居寄城西程漢翁十五韻

長風沙夜泊

何郎失鏡詞

贈青城侯尊師次人韻

贈友

曉出順承門有懷太虛

京城閒居雜言八首

去婦詞

四友詩

賦雙陸

泊安慶時再北游

漁父

高郵城

濟州初度

楊柳青謠

雜詩四首寄彭通復

柏堂詩

卷之二

獻張平章

題祝道士龍虎山先天觀

二貞詩

史館獨坐

周待制致樂堂詩

馬氏巖溪圖

山水圖

送道士薛元卿歸江東

大明殿退朝和周待制

祖生詩

孤雌行爲鄆城節婦作

燕氏救兄詩

送華尊師以天壽節奉詔祀武當

送馬雍古御史撫諭河西

送周山人之遼東

李宮人琵琶引

題上都崇真宮陳真人屋壁李學士所畫墨竹走
筆作

集賢大學士趙國公王開府慶八十應制

陵陽牟景陽以名祖父之子孫負奇材勁氣而與

世抹撥自台州教授入掾翰林一語不合竟棄

去不顧以詩爲別

結羊腸詞

劉承旨父大司徒邢國公慶九十應制

小孤山次韻

贈別曾編修歸廬陵葬學士兄

寄題臨川西澗范氏寓居

尋舍弟將至東牢宿野店

贈王郎

沈逸人東觀招飲山館

畫鴨

題聶氏陶軒

送涂雲章訪舊武昌卻入京師

歸舟

小孤山曉發和蔡思敬韻

大信晚泊呈舟中諸公

白楊河看月

歌風臺和李提舉韻

題嚴陵獨釣圖

題饒鼠食瓜圖

哭信州仙源觀徐尊師乃元教大宗師張開府之

弟子也

送蔡思敬還豫章有懷遼陽李提舉

孔林圖詩

壽樸山詩一首為吳真人公生朝作壽樸山其里

山名

壽王副樞

李將軍歌一首送李天民赴邵武軍口巡檢

題桃源圖

送人歸豫章

送王留守宣慰荆湖

題張尊師畫

送播州楊宣慰歸藩

寄題括蒼王氏東野二亭

畊雨心遠

寒夜作

送唐尊師祠武當

送詹尊師歸廬山

贈淳真子

孤松篇壽王大學士

過何得之故居五首

送譚仲章歸長沙

我我亭詩

送鄭司獄歸衢州却赴調京師

題山水

題御馬圖

題山暉圖為劉尊師作

題臨江同知問流民事蹟

寄題朱氏真村堂

送人從軍

題淵明歸去來圖

卷之三

題明皇出遊圖應制

送孔學文赴大庾巡檢

送李都事赴湖廣省幕

畫鷹

題張使君棄官學道詩卷

送戶曹掾于孔昭赴南臺掾

寄題胡氏園趣亭

題文瑞圖

題南頓孔氏復明詩卷

奉同柯博士甘內掾下直賦

賦得海上雲送良上人歸徑山

吳子高悼亡歸岳陽

秋夜作

進士張子高得邛州判官歸成都

題陶淵明歸圖

寄題傅尊師兄弟所作寧壽道院

二月朔日雪中題歐陽少監所藏宋好古畫竹

雲錦溪棹歌七首

御書雪林二字賜趙中丞應制

題胡虔汲水蕃部圖應制

題辛澄蓮華觀音像應制

杜節婦詩

題內府畫四首應制

韓滉土星像 曹將軍下槽馬圖

韓幹馬 宋徽宗成平殿曲宴蔡京圖

送秘書李道濟赴峽州幕

奉送全平章赴江西

題青山白雲圖

桃華鸚鵡

趙孝子

題姑蘇陸友仁所藏衛青印

廬山連尊師求真陽詩久諾而未作也一夕夢中

得之因書以贈

贈項鍊師

送鄉人祐上人從師歸當陽

送蘇尊師歸茅山

寄題張齊公廟

題李安中白翎雀

寄題楊教授菊莊

番易蕭性困攜其祖將領所愛唐琴號霜鍾者還

自和林求詩六月三日五門宣赦後作

送王伯循編修赴南臺御史

寄題鄴下樊氏鍾秀園

題廖氏皆春堂

大駕既幸上都率奎章諸生之留京者讀書宮南

史館中得大熱疾勢危甚項君子虛視之一藥

而起為賦五言一首為謝

周氏敖山驛水木清華亭

題趙照磨虛舟

送毛真人還龍虎山

故中憲大夫嶺北行省左右司郎中蘇公志道哀

詩

題羅稚川所畫臨川羅益謙溪居圖

寄題武寬則湖山堂

十月十八日夜南郊齋宿夢先帝召見便殿手賜

橘花一枝有感而作

寄題上饒鄭氏菊莊

題四清圖

題新安許氏蘭秀軒

夢題墨梅

寄題永豐劉氏暖翠亭

寄題信州德元觀何真人林園長春亭

題信上人春蘭秋蕙四首

蔡七祖真人得朱文公所書讀書二字以名其齋

請賦

送陰陽蕭教授赴瀏陽

賦得春雁送張郎中省覲揚州

送聶大祝赴潮州錄事

題俞氏看雨軒

題江道士清虛館

賦得吳歌送人歸吳中

揭曼碩詩卷一

臨川女

虞山 毛晉子晉 訂

我本朱氏女住在臨川城家世事趙氏業惟食農耕五
歲父乃死天復令我盲莫知朝與昏所依母與兄母兄
日困窮何以資我身一朝聞密言與盲出東門阿母送
我出阿兄抱我行不見所向途但聞風雨聲行行五里
餘忽有呼兄名兄乃棄我走客前撫我言我與趙世親
復與汝居鄰聞汝即赴死扶服到河濱我身盡沾濡不

復知我身汝但與我歸養汝不記年泔泔遵旋路咽咽
還入城城中盡驚問戚促不能言望門喚易衣恐我身
致患再呼我母來汝勿憂饑寒汝但與盲居保汝母女
全我母爲之泣我鄰爲之歎喜我生來歸疑我能再明
况得與母居不異吾父存我今已十三溫飽兩無營我
母幸康彊不知兄何行我母本慈愛我兄亦艱勤所驅
病與貧遂使移中情當日不知死今日豈料生我死何
足憾我生何足榮所恨天地生不如主翁仁誰能爲此
德婁公名起莘

夏五月武昌舟中觸目

兩髯背立鳴雙橈短簑開合滄江雨青山如龍入雲去
白髮何人竝沙語船頭放歌船尾和篷上雨鳴篷下坐
推篷不省是何鄉但見雙雙白鷗過

張君壽先生鵠山隱居

當日自期顏果卿莫年羞見魯諸生膝兼多病終難屈
身爲長愁視轉輕日晏典衣畱客醉雨餘開戶看見耕
淮雲楚樹晴如埽卧送年年江水聲

送趙履道虞叔常還江右

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鶴磯頭望君庾公
樓上

寄題九江義門陳氏壽安堂

匡廬之陰彭蠡涯七百餘載真良家宋御書表其門曰真良家冲和
鬱勃吹不散飛落南山萱草花往時冠蓋如流水撞鐘
鼎食三萬指詔書十度復租庸每歲朝廷仍貸米父慈
子孝則四方紀淨綱明照閭里蓬萊水淺昆明空天開

地闢元氣通張公百忍澤未竭王母千年桃始紅南山
築堂三百步翠竹屯雲森玉樹忠厚必有神明扶淳樸
自是期頤具方瞳綠鬢紅氍毹春酒搖蕩香扶疎公侯
子孫始必復日為大夫人起居

正月十二日尋盧學士船至漢口留詩為別

晴江澹微瀾曳雲在曾巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將人窈眇春猶淺新知遽相違餘棕何由展

黃尊師高軒觀鵝因留宿

開軒南嶽下世事未曾聞
落葉常疑雨方池半是雲
偶尋騎鶴侶來此看鵝羣
一夜潺湲裏秋光得細分

衡山縣曉渡

古縣依江次輕輿落岸隈
鳥衝行客過山向野船開
近嶽皆雲氣中流忽雨來
何時還到此明月照沿洄

題王山仲所藏瀟湘八景圖卷走筆作

瀟湘夜雨

泠泠暗江樹荒荒楚天路
穩繫渡頭船莫放流下去

遠浦歸帆

冥冥何處來小樓江上開
長恨風帆色日日誤郎回

煙寺晚鐘

朝送山僧去莫喚山僧歸
相喚復相送山露濕人衣

洞庭秋月

顚氣自澄穆碧波還蕩漾
應有凌風人吹笛君山上

平沙落雁

天寒關塞遠水落洲渚濶
已逐夕陽低還向黃蘆沒

漁村晚照

定從海底出且向平沙照
漁網未全收漁舟還下釣

山市晴嵐

近樹參差出行人取次多板橋雙路口此世幾迴過

江天暮雪

孤舟三日住不見有人家昏昏竹籬處卻恐是梅華

以事薨如武昌發臨川

江轉欲無路山迴忽似圍客程秋共遠物色晚多疑稍
稍沙鷗集忽忽野樹稀武昌今夜夢定有故人知

女兒浦歌

女兒浦前湖水流女兒浦前過湖舟湖中日日多風浪

湖邊人人還白頭

又

大孤山前女兒灣大孤山下浪如山山前日日風和雨
山下舟船自往還

送尹十六善叟謁告歸茶陵會葬賢兄處士十韻

八歲賴賢兄未理猶望生旋聞日下葬敢戀世間榮得
告如無及巖期况有程意長看路短義重覺身輕鄉樹
迎船出江雲入莫橫望山占驛埃聽雁作城更但使能
臨穴猶堪略慰情死生今古異去住別離并尚足酬知

已非貪美俗評匆匆不可盡迴首各沾纓

送黃五舅得武陵校官還辰州寓居省侍

寧上山頭種禾黍莫向他鄉作羈旅山田得雨尚有年
他鄉顛顛何人憐一身千里家何在全家更在沅湘外
獨樹雞鳴楓葉飛荒村雁沒蘆花碎親在窮邊望子還
子在長途衣復單居無寸田出無僕明年作音官當食

祿

貧交行

驅車涉廣川揚帆陟崇丘結交四海內中道多愆尤朔

風厲苦節獨鶴橫九州朝拂三島樹夕過五城樓兩翅
偶寒影曠然何所求登高臨大江日莫萬里流時哉疏
鑿人八年忘外畱出必益稷俱歸與夔龍儔進退兩不
疑功成垂千秋萬事日相敘恩情若雲浮吾心苟不渝
反覆安足仇自非天地外何能獨忘憂

曉坐張先生朝陽軒

朝日照高樹幽人方啓關蕭寥塵外事風葉滿窻間

別武昌

欲歸常恨遲將行反愁遽殘年念骨肉久客多親故佇

立望江波江波正東注

南康夜泊聞廬阜鐘聲

廬山三百寺何處扣曾雲宿鳥月中起歸人湖上聞入
空應更迴近瀑正難分遙想諸僧定香爐上夕熏

春日雜言七首

日月朝朝新何物能獨久常恐天與地變化習已朽東
風闖然來茫茫浩無首起視桃李樹睽豔一非舊如何
揚子雲泯默空自守

又

朝出城西門孤墳何穹窿雄狐竄其西脩蛇出其東云
昔有狂士七尺才且雄平生無所賴屠狗涉春冬一朝
際風塵身貴位益崇死生好惡間咄惜生秋風氣驕日
憑陵家國兩蒿蓬子孫分散盡空有牛羊蹤

又

翳歷楊柳枝蒙茸春草齊天天誰家婦采桑臨路岐零
露沾其裳蛛絲卷其衣樹高身苦弱蠶飢行復遲辛苦
事姑嫜宿昔減容輝見者皆歎息此心知獨誰良人日
莫至醉問爾何為

又

啁啾田間雀啄啄常不給春水日已深網羅復相及既
無養生具日夕湯火急多謝雲間禽無為自羈縶

又

祝融九千丈瀟湘地底流洶湧洞庭野崩騰江漢秋上
有飛仙人身披紫雲裘昔者嘗相遇渺若乘丹邱同歌
黃鶴渚共醉岳陽樓思之忽不見獨立悵悠悠

又

我有琅玕草欲贈江東客出門道路長卷袂空歎息靈

苗世所尚良士余所惜神仙無千年耿耿誰復識

又

五歲能讀書十歲能賦詩十五事遠遊三十無所為既
乖俯仰責復為隣里欺生計日已疎世態多瑕疵煌煌
金張門徒隸皆光輝日晏賓客集軒車如風馳一笑擲
千金片言委黃泥齊生獨抱瑟來往何逶迤

夢兩雛

阿英十二能辟纊阿牛五歲貪讀書辟纊成縷無人織
讀書有志令人惜汝父飄零汝母休吾親雖健俱白頭

雨聲斷道風驚屋阿婆獨抱諸孫哭

夢武昌

黃鶴樓前鸚鵡洲夢中渾似昔時遊
蒼山斜入三湘路落日平鋪七澤流
鼓角沉雄遙動地帆檣高下亂維舟
故人雖在多分散獨向南池看白鷗

遊麻姑山五首

并序

湖北憲使程公間居盱上二年矣五月二十日
詔拜翰林學士又十日公與使者及諸客同遊
麻姑山輒以覽歷所止賦詩五首

雲關

君子荷初服恩至若無榮穆穆芳雨散悠悠蒼山行危
關擁霧黑飛術綠雲青苔蘚滑如積杉松窅冥冥時逢
負苓翁忽聞流水聲舉足向益高矯然欲遐征徒隸各
忘倦矧彼高人情

飛練亭

神工擲天紳挂之兩崖間萬古輪不盡誰能測其端勢
割山石愁氣挾草木寒安得天風吹繫彼日月還麻姑
綠雲髮黝黝長不殘

湧雪亭

泉源出地底仰向雲中行
擘崖瀉千丈亂石皆騰淅風
霏日夜急雨雪虛空明
不有神物扶茲山應久傾噴薄
側飛鳥碎錮愁百靈僊家信爲好喧聒何由平

三峽橋

兩山東飛橋下壑不測淵誰開萬尋鐵逗此無窮泉淙
淙輾空曲洶洶投奔川陽光下照之忽作龍騰天常恐
桑田變中有瞿塘船

麻姑壇

嵯峨僊都觀遙望丹霞天
後有千歲松前有百頃田
風日夏颯颯烟雲晝蔥芊
羣彥一時集安知非列仙
持觴起相疇罷琴抗高言
天道信悠邈人情何拘攣
靈君不可致落景詎少延
仰雖慙冥冥俯實憂元元
主人顧坐客此中可忘年

盧學士奉旨南祀海嶽繇鍾陵相別聞尙宿畱會

稽有懷奉寄

鍾陵一分手幾日過錢唐
五日山陰路千峰海上涼
烟霞含景氣草木識天香
夙昔經行處風流轉不忘

病夜

素壁深窻獨客身
桃枝薑肱只爲鄰
極慙供給煩賢友
尙恐傳聞及老親
蠶響戒寒相應起
燭花連夜爲誰新
多情造物真豪縱
盡力相驅病與貧

得程翰林揚州消息

皇明屬休期側席佇貞良
游麟旣集藪鳴鳳亦在岡
君子乘時興出餞何輝光
車馬塞江介笳鼓疑羽觴
時秋風雨交四顧野茫茫
晨鉦激中流飛旆忽異方
蓄思遵旋軌浮雲紛北翔
道路間邦畿草木隕寒霜
曷景條易

流悲來但徊徨君懷經綸憂余負災疾妨騫沉固異趣
情誼結中腸居下衆所夷在賤誰不忘宛緬廣陵翰胡
獨置我傍鬱悒增愁思投袂睇莽蒼自顧匪茅茹委跡
任空墻淵淵賢達心悵悵情內傷

歸故園新居落成後作

親老身仍苦家貧歲更凶
掄材斤斧後發地草萊中
面執看前跡歡呼集衆功
聊存今日意敢望昔時同

又

漂轉何多歲艱難且定居
隣人供菜果穉子進詩書
稍

覺牛羊遠兼知蔓草除此園三百載亦復返吾初

山行

稍出羣山復涉溪溪光山色冷相輝青裙獨踞溪邊石
不顧行人自濯衣

寄題馮掾東臯園亭

時雨散繁綠緒風滿平原興言慕君子退食在邱園出
應當世務入詠幽人言池流澹無聲畦蔬蔚蔥芊高林
麗陽景羣山若浮烟好鳥應候鳴新音和且閒時與文
士俱消搖農圃春理達自知簡情忘可避喧庶云保貞

和歲莫委周旋

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合
石稜斜鬪浪聲齊南風盡日迎歸客落月空江夢故妻
一室十人分數郡百年幾處候晨雞

送趙仲遠赴甌寧

仍爲令尹去如送武夷仙舊政聞人說新詩海客傳度
關風撤暑下瀨月依船不奪循良意應知幕府賢

山莊晚立有懷舍姪沈督獲臨川

蘇蘇黃桑葉蒼蒼白竹峰居人爭野碓歸客背村鐘路
暗綠溪溼山寒著霧濃阿咸收稻未辛苦闕相從

哭王十良仲

深谷可爲陵大海可爲田唯有死者窮無由覩青天千
古黃壤間萬古黃泉下精神與時息形質隨日化日落
朝復生月缺望已盈不知死者別何時見形聲悲哉復
悲哉已矣復已矣我友初五人今焉忽成四死者不復
見生者長別離人生如春花美好知幾何欲爲生者歡
復念死者苦死生日相尋歡樂如糞土

雨述三篇

江南臘月天未雪居者單衣行苦熱連山郡邑瘴盡行
豈獨嶺南與閩越通民穰穰度閩山十人不見一人還
明知地惡去未已可憐生死相追攀

又

近聞閩中瘴大作不聞村原與城郭全家十口一朝空
忍飢種稻無人穫其言海上列城好地冷風清若蓬島
不見前年東海頭一夜潮來跡如埽

又

冬來一晴四十日三日南風當有雪不知閩嶺今何如
念我故人書斷絕劍南判官心所親甌寧大夫政有神
腐儒多事浪憂喜安得貽書兩故人

春莫間居寄城西程漢翁十五韻

迢迢曾城阿我我鳳皇山下有隱淪士能爲淮漢言兩
日一寓音五日一承顏每談經濟事恒及離亂間言辭
多忼愾文字少凋殘不歎東逝川但憶南山田寧與無
心遊不受衆目憐褰衣必峻嶸散步亦名園舒卷信在
襟蕭寂固所安經春僭疾痲撫時增慵屨羣書亂藥裹

高臥掩荆關蹇余屬久要朝詣常莫還醜劣愧高情焉
知君所觀日出衆鳥語蒼岑滿樓端申章寫深誼謏薄
何由宣

長風沙夜泊

長風沙風沙不斷行人嗟行人嗟奈君何南風正高北
風起大船初灣小船喜移船更近大船頭不獨風沙夜
可憂但祝行人好心事長江何處是安流茅屋參差數
株柳時平尙置官軍守青裙老嫗詫鮮魚白髮殘兵賣
私酒魚賤可買酒可沽他人心事知如何

何郎失鏡詞

團團如月不曾虧家人親置枕中時朝朝將正頭上幘
時時攜鑷鬢邊絲古文宛轉何人造失來始覺今難討
街頭不直半緡錢古銅終較今銅好向人不敢再三尋
客裏空疑同舍心萬里相隨一朝別夜夜還瞻天上月

贈青城侯尊師次人韻

聞說名山采藥蹤多從雲去少人逢蜀江春老歸難定
燕谷寒來望轉濃案上僊經新長蠹匣中雄劍舊降龍
不知少日尋真處還在青城第幾峯

贈友

天道有恒運君子蹈其常時物自熙洽庶心亦惟康鄙
人寡慮思殊氣冒陰陽霜霰中夏零焉得不摧傷先聖
有遺訓血氣戒方剛懿彼老氏言舌齒示存亡反躬實
明哲撫已增忼慷正德詎云割率欲乃非祥勿謂壘空
明不足輸景光勿謂徑寸莖不足載春芳推餘暨所闕
懷哉安能忘

曉出順承門有懷太虛

步出城南門悵望江南路前日風雪中故人從此去

京城閒居雜言八首

都城列萬雉樓觀切飛霞太液深蕩潏廣寒高峩峩重
譯踰萬國流聲竟四遐旣寵瑰異才復保勛舊家忠厚
跂行葦明照徹羲娥永惟皇上德世世襲亨嘉

又

冀北多良馬漁陽多壯士馬休伏槽櫪壯士習農器桑
棗竟中州朝貢四方至外無烽燧警內有耳目寄消搖
放良時歡樂永不替

又

濟濟從臣內赫赫公與侯伊昔從我皇守邊瀚海頭荷
戈十餘載力戰如已憂寸策無遺用長智少淹畱勞多
必重賞功大靡輕酬意氣相傾動恩深身若浮天子乘
六龍垂衣臨九州茅土亘河山甲第隘莊馗四海仰光
耀出入擁華駟富貴歛如此寵祿信難侔從軍亦云苦
眷言亨斯邱

又

朝從獵城南暮從獵城北白馬喻飛翰輕裘如膏澤塵
起知獸駭風高驗鳥疾隻箭落雙鶩千金出俄刻歸來

拜恩寵樂飲過一石僮奴增意氣賓客改顏色常恐文
法士輕薄多瑕擿高門臨廣衢秋風上荆棘

又

朔土高且厚民生勁而彊榆柳雖弱質生植益繁昌桃
李大於拳棗栗充餽糧誰謂苦寒地百物莫得傷青青
雲夢竹宿昔傲雪霜移植於此庭不如芥與楊竹性豈
有改絲來非本鄉

又

耿耿寒門士客遊燕薊城上無公卿故下無舊友朋裘

褐不自蔽藿食空營營四顧裁沴餘但聞號哭聲日負
道德懿敢懷軒冕榮節食慎所欲聊以厚我生

又

高步覽九州誰獨無與親同室不相喻矧彼途路人誘
誣更驅迫巧詐日眩真其美為善樂莫知與善鄰未足
保厥躬已謂貽子孫一言易為義一恩易為仁世無魯
東叟何以慰心神

又

哀飈驚野草日夜委鮮萋以哉白楊樹高高凌元虛朝

遊車馬中夕息思故廬塵今難爲潔野性非京都貧賤
不自保焉能戀簪裾賴有死與生可齊賢與愚

去婦詞

江東有一士子留都下三年適娶一貴人女爲
妻久乃知其已有妻子矣一夕逃去因託去婦
爲之詩非徒欲傳其事抑以示風戒云爾

輕合鮮義終苟容希禮遇遠結萬里昏多爲才名誤始
與君結好不知君有婦有女嫁他人俱懷託遲莫青青
墻下草生死墻下路娟娟道傍華零落無處所女子失

其身何以保貞素既乖百年意百年誰能度對鏡空悲
暗中心良難訴浮萍難爲託一木無兩附棄舊屬新歡
新歡漸成故寧當中路析莫被他人去寧老阿母傍不
受他人妬騰身出房闈兩絕無復顧所願嫁他人甘心
西山樹

四友詩

四友者廣信王庭鈺良仲臨川李商弼良佐武
昌盧廷鸞子儀同里熊坦從正也李亡已七年
餘亦亡二三年余索居京師每夕夢寐與四友

相接傷其皆賢而無壽又與余篤好迺作四友
詩一以志余哀一以槩見其平生云李得年二
十二盧二十九熊三十四王四十有九

三兄負奇偉十四已應門倉卒遘閔凶盜賊蔽邱原衰
經從伯父慷慨安其人豪橫劇狼虎瞋目莫敢干降心
相款密共稱孺子賢時應州縣役調笑官長尊酬接雖
靡鹽講習日多聞激烈忠憤際委曲禮法間時平俗益
康放志農圃言有集曰浮湖感龍變管汎彭蠡見龍見
圃課絕遂肆意墨龍悟解陟巘思鳶鷺古笛振哀鐵清琴繁素絃每傷古人逝

迸淚尊酒前與我初識面已誓為弟昆誰謂天不仁中
路遂離分寥寥昂山阿黝黝硯井泉賓客一以散託夢
與招魂嘉木不叢生猶為造化欺繁霜凋其葉震風蕩
其枝利蟲齧其根飢禽啄其皮豈無雨露滋不得干雲
霓李氏年弱冠博通三氏詞援毫捷飛電吐氣裂豹螭
信如海上潮直若琴上絲朗如九秋月温比三春暉志
在躋聖賢寧復顧所私一悟生滅理天地忽若遺君卒時一
日晨興有數道人叩門請求作白蓮菴記君援筆而就
大為得意有頃忽奄然坐逝父母聞而趨哭之迎謂父
母曰某兄弟幸多死生命也勿以為憂既瞑一道人撫
其背曰檀越檀越生好處復瞻目視道人厲聲

日佛法本無生滅遂卒癸卯二月也顏回蚤聞道短折
葬時衆輿出城初不能勝忽輕如羽顏回蚤聞道短折
非所悲茫茫後死者中夜獨漣漣

又

武昌故舊中盧生亦奇傑雄才傲當世高誼凌白日貧
賤有相知富貴莫能折冠蓋如雲霧而獨與余密大德
七年夏予有長沙役臨河與余分攬袂久嗚咽知心託
生死誰能此離別千里竟相從風波復炎熱青天入杯
酒歌嘯中夜激便欲乘滄溟迢遙送華髮行行亦云至
終當與君折捨棹卽長途惆悵如永訣謂余平生懷時

俗莫能達學不追古人終不願有室還聞起分教小邑
傍蕭瑟始爲賢者哀那知遽淪沒樊山罷歡讌赤壁空
流月佇立想音形音形一何濶

又

親友日凋謝况我情所鍾熊子三十餘亦在九原中高
才祇促齡積善適爲凶天道不可依人命如飛蓬夢寐
常相見烟若生相從亦知心不異矧復里閭同始君椽
韶學我心實忡忡歸來已三年微疾竟永終薄祿不救
飢一官非高崇獨令君子亡碧血冷秋風鄰曲恩愛絕

山川談笑空名家失金匱樗櫟入公宮誰復繼粹溫徒
用想春容千秋瓘山路繚繞劍池東

賦雙陸

三五對參差高呼得采時猶疑雙出早每恨獨歸遲散
地偏難入全功或誤奇極知妨目力聊足審安危

泊安慶時再北遊

夜泊淮西郡寒生客子衣酒家臨岸閉野燒映江飛雲
盡月初出潮平風漸微前年城下路此際正南歸

漁父

夫前撒網如飛輪婦後搖艫青衣裙全家託命烟波裏
扁舟爲屋鷗爲隣生男已解安貧賤生女已得供炊爨
天生網罟作田園不教衣食看人面男大還娶敝家女
女大還作敝家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

高郵城

高郵城城何長城上種麥城下種桑昔日鐵不如今爲
耕種場但願千萬年盡四海外爲封疆桑陰陰麥茫茫

終古不用城與隍

濟州初度

辭家計日逢初度
遲日暄風在帝京
曉起慈親望天北
行人初泊濟州城

楊柳青謠

楊柳青青河水黃
河流兩岸葦籬長
河東女嫁河西郎
河西燒燭河東光
日日相迎葦檐下
朝朝相送葦籬傍
河邊病叟長回首
送兒北去還南走
昨日臨清賣葦回
今日販魚桃花口
連年水旱更無蠶
丁力夫徭百不堪

惟有河邊守墳墓
數株高樹曉相參

雜詩四首寄彭通復

日月麗中天
列宿爛昭昭
河漢高且深
烏鵲以爲橋
寒霜昨夜降
時菊委嘉苗
地勢西北雄
終歲皆風飈
元工宰萬物
時至有榮消
常恐光景馳
不得與消搖

又

區區九州內
橫從數千里
誰設山與河
愚者分表裏
京師天下本
萬國赴如水
珠犀從南來
狗馬繇西止
浩浩荆吳船
日夜行不已
生材無定所
一物孰非已
皇天仁

且廣君道亦如此我思古唐虞當日誰共理

又

巢由伏箕穎園綺居商顏洗耳甘自潔茹芝竟不還三
傑足爲理五臣安可攀高尙誠所貴孔轍奚獨環吾聞
有隱淪多在衡霍間飯牛腹長飢百結淒以寒懷寶羞
自獻邈然老空山

又

脈脈我所思彭氏躡遐踪婉婉若處子未曾出房櫳相
望四千里踰年闕相從五月君寄書九月達京中我書

欲報君書到歲已窮豈不懷繾綣無繇覲君容參差天
際雲縹緲乘胡風羽翼不吾施翩彼南飛鴻君有高世
行我無適時功天命人得運出處諒非同

柏堂詩

柏堂爲劉母熊夫人作也夫人有淑德年二十
五而寡守志不嫁有子曰觀又賢作堂以奉其
母請名於太史氏謂之柏堂而作是頌

鬱彼北堂言樹其柏其柏嶷嶷維木之特柏之始生于
彼高陵雨露其凝金石其貞柏之旣成鳳臆鸞膺言樹

揚曼碩詩卷一
斯庭霜雪是憑雪霜浩浩其柏矯矯有美君子而弗偕
老其葉欒欒其節桓桓其居安安永世式觀我堂既構
我柏既茂天錫眉壽保艾爾後

揚曼碩詩卷一 終

番禺孟鴻光校

揚曼碩詩卷二

獻張平章

虞山 毛晉子晉 訂

天厯肇元朔坤輿集皇靈汴蔡旣榛夷南海淪炎精圖
書入天府將帥功業成寶玉被親懿茅土列公卿庶類
奮休祥羣賢基太平明公紹鴻烈文采敵華聲出入三
十年惕然心靡寧論兵體安危攬轡思澄清矧宅股肱
地夙夜在王庭名高德益難位隆責匪輕聖心誠宏裕
臣節美戰兢唐虞登夔臯堯舜猶日升周召竭師保成

揚曼碩詩卷二

海山仙館叢書

康措王刑昌明願同濟拔筆播芳馨

題祝道士龍虎山先天觀圖

聞說先天觀重重絕壁環鳥啼青澗裏花落白雲間樵
子能長嘯居人識大還洞門無處認唯有水潺湲

古人二貞詩

關右有姬氏者父子皆蚤世姑趙婦張皆以年

二十五而寡守節不嫁作二貞詩

關右有姬氏父子蚤棄捐孀婦奉寡姑誓死各芳年膏
沐誰復理羅襦委篋間辛苦事蠶繰祭祀亦靡愆父母

既莫奪媒妁徒空言鳧雁安所施幣玉視如烟寧與枯
瘁沒不為歡樂存婉婉桃李花春鳥何翩翩萬物各知
時姑婦獨纍然

史館獨坐

地寬天逾近風高午尚寒虛庭松子落歌檻菊花乾撫
卷俱千古憂時有萬端寂寥麟父筆才薄欲辭官

周待制致樂堂詩

有堂渠渠在番之區維周壽母式燕以娛渠渠有堂在
番之陽維周壽母式燕以康斯堂何有有蘭有芷垂佩

樂樂維周之子斯堂何有有蘭有蓀垂佩申申維周之
孫曰烝曰嘗孔時且具維甘維旨承于壽母母曰寧只
福祿凝只升斯堂只我心平只母曰嘉只福祿遐只升
斯堂只我心和只

馬氏巖溪圖

何處幽巖下復有清溪瀉霧氣散長林湍聲落平野石
宜白鳥憇樹想元猿把誰獨此安居居人云姓馬

山水圖

幽人無世事高卧謝浮名山崦晴時出溪流盡處行還

聞有漁釣相問扣柴荆不掃門前路莓苔滿地生

送道士薛元卿歸江東

知君此去漸難招只在人間已廓寥市上有時逢賣藥
山頭何處覓吹簫仙巖華落溪流滿鬼谷雲開對影遙
未必故山安隱逸海天涼月夜蕭蕭

大明殿退朝和周待制

巍巍道德拱羲皇濟濟威儀陋漢光日射龍文宮女扇
風傳雞舌侍臣香中霄景氣浮雙闕下界歡謠動八荒
詞館小臣何以報皇圖聖壽與天長

祖生詩

浦城孝子身姓祖自憐性命如糞土生纔五歲遭亂離
有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在
看書未盡淚先流書云流落河南縣河南陽遍無由見
唐州境上忽相逢白髮蕭蕭霜滿面誰知喜極情轉悲
旁人更問初別時千生萬死到今日始爲母子東南歸
東南迢遞閩山路入門猶記階前樹居人傳說盡相看
雞黍提攜竟朝暮祖生母子真可憐少壯離別老大還

同時鄉井被兵者幾人骨肉能生全願生母子長壽考
四海升平永相保

孤雌行爲鄖城節婦作

有鳥有鳥雌雄相追哺雛未飽鳴且飛雛未長雄乃死
子亦隨朝朝暮暮唯孤雌長林廣野風日美步步不敢
離故棲燕雀搖颺差復池迴身側腦遞相欺誰憐孤雌
心到死終不移更有許州鄖城徐氏母一生抱恨守空
閨

燕氏救兄書

揚長石詩卷二
四
千金之子不死市楚人竟殺陶朱子生者可殺死可生
千金爲重骨肉輕誰謂平陽有燕氏傾家乃出而兄死
弟再有兄兄見弟里閭驚嗟官吏喜嗚呼安得天下之
吏廉且循庶政如水無冤民

送華尊師以天壽節奉詔祀武當

靈時嚴漢祠神峰標楚甸羽人丹丘伯承詔馳嘉薦華
渚曜玉虹條風舞元燕長淮雨中瀉喬嶽雲間獻涉旬
厯峻陟梯空蒼宏願授簡香始升揭虔帝如眷天清翼
軫動地肅元武見飛響迴更聞奇祥靜逾絢是中有真

侶蚤接諸方援胼胝負畚鍤鑿翠蓄雷電金芝產齋房
鬲雲冠巖殿祈禱無歲年會節方紛衍旣協時君降又
樂明祀徧聖厯齊堪輿豐澤周寓縣還歸報天子獨往

奚所羨

眞侶謂張眞
人有道行

送馬雍古御史撫諭河西

我皇屬憂顧君子得安居孟春風且寒遺子以修途四
壯何翩翩迴首睇神都我懷正紆鬱殷函忽已踰積雪
被長巒萎者何時蘇歸彼蓮花峰上出浮雲衢白日皦
以縣下視若元墟煙塵起西北原野無定株行者中顧

懷居者念其廬黃河洶東流乃自崑崙渠四海豈不曠
切若肌與膚親賢遠讒人古以致康娛君子誠多材乃
用在馳驅秦隴阻關塞歲月浩已徂鞠躬盡明義足爲
世所模

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲槎隔遼海

李宮人琵琶引

鄆縣亢主簿言有李宮人者善琵琶至元十九

年以良家子入宮得幸上比之昭君至大中入
事興聖宮比以足疾乃得賜歸侍母給內俸如
故因亢且乞詩于余遂作李宮人琵琶引其辭

曰

茫茫青塚春風裏歲歲春風吹不起傳得琵琶馬上聲
古今只有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈爲紅顏惜
自是衆人彈不得玉觴未舉樂未停一曲便覺千金直
廣寒殿裏月流輝太液池頭花發時舊曲半存猶解譜

新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尙被宮中召強理琵琶絃上音
琵琶轉調聲轉澁堂上慈親還佇立回看舊賜滿床頭
落花飛絮春風急

題上都崇真宮陳真人屋壁李學士所畫墨竹走

筆作

玉京灤水上仙館白雲鄉虛壁數竿竹清風生滿堂微
吟弄寒影靜坐佇幽香有客仍無事澹然方爾忘

集賢大學士趙國公王開府慶八十應制

昭代雍熙日詞林賦頌時紫宸丹詔出甲第五雲垂裕
廟青宮裏王公玉樹枝朝趨倍綺角夕侍接龍夔際會
真難及飛騰已在茲暴公初繡斧方叔更藩維霜簡驚
風采天官肅羽儀還迎代邸入竟被漢文知位望躋三
少權衡俯百司每蒙天黼黻直許國著龜鳳歛庶寒殿
龍舟太液池羽觴春侍宴玉座夜觀基德業前賢繼辭
華後進推高情希廣受餘事擬徵珪全道山河富瀛洲
日月遲九卿看綵服八表表龐眉皇覽逢初度殊恩介

壽祺黃封中使出玉食尚饗移國老陳嘉慶李韓公羣
工播盛辭禮非前代有施及老臣宜福祿何人竝忠貞
百歲期聖心誠念舊政用作臣規

陵陽牟景陽以名祖父之子孫負奇材勁氣而與

世抹掇自合州教授入掾翰林一語不合竟棄

不顧以詩為別

奇璞別之媒娥眉妬之具悄悄君子心皇皇百王度高
風集大木日夜如吼怒不畏枝葉殘但恐本根蠹曉登
崇臺上天地一何巨白日光未吐羣星爛無數仙人五

雲車縹緲玉清路區區陰陽忠可望那可遇忽聞金鑾
客歲暮仍南去不得與之同頓足毛髮豎

結羊腸詞

正月十六好風光京師女兒結羊腸焚香再拜禮神畢
剪紙九道尺許長撚成對縮雙雙結心有所祈口難說
為輪為鐙恆苦多忽作羊腸心自別鄰家女兒聞總至
未辦吉凶憂且畏須臾結罷起送神滿座懽忻雜顛顛
但願年年逢此日兒結羊腸神降吉

劉承旨父大司徒邢國公慶九十應制

聖主尊賢遂及親邢公盛事更無倫身躋九表瞳方碧
兒過耆年鬢未銀鳩杖乍頒寧畏噎龍章洊拜欲忘身
上公建土山河富光祿分壺雨露頻析木天清雲五色
梁園花發月重輪錫宴梁氏園三宮寵錫驚殊數四座稱觴
半老臣瑞錦爛熳迎化日兼金條脫照芳春素烟冉冉
晴熏上白雪冷冷豔曲新先世勲庸歸琬琰名家父子
映冠紳三槐已驗移居日五柳翻如寄傲人澗底桃花
會閱世枕中鴻寶自顧神詞臣欲繼莊生作才薄何堪
論大椿

小孤山次韻

小孤山前一廻盼蒼然始識孤山面隔江疊嶂開翠屏
絕壁浮雲飄素練憶昔初蒙翰林聘艤棹探奇不知倦
捫蘿涉級至絕頂目極神開氣爲變大江東匯彭蠡來
晝夜崩騰犇海甸笳鼓遙聞日月動帆檣忽度乾坤轉
舟人不識造物奇但趣急趨南風便蚤悟微官七載縛
底用區區厭貧賤深窻冷壁守編摩何異揚雄困雕篆
重來勝地歲云暮短景催人疾于箭天昏一火明山半
石底猶疑有雷電彭郎磯下寒浪湧坐客正說龍君傳

人生可喜還可憐世事堪違不堪戀明朝匡廬復入眼
雖有此境何由羨武城先生獨好事名山每恨遊難徧
豐城客子無一錢但當作詩乞如願

贈別曾編修歸廬陵塋學士兄

孟冬涼風厲謁告歸廬陵阿兄在九原歲暮豈遑寧兄
昔事武皇海內希英聲意氣動人主文采何從橫時事
一朝異長揖去躬耕令弟紹芳猷策足在承明如何奄
忽間南北隔死生方舟發京國日落烟霧青萬感緣中
來惕焉如有懲羈臣戀魏闕一夕魂九升君子恩義重

况此骨肉情情深不可忘悠悠道路長山川日夕改我
行殊未央稍出燕冀都已涉齊魯疆高天圍四野悵望
但茫茫道傍多古墳坐域遞相當荒草吹北風日夕下
牛羊不知何代人于此閱興亡自古既有死誰獨免權
傷死者雖所同私懷詎能已塗路猶感傷况我兄與弟
世俗日衰謝常懼莫能起生者忽若遺誰復哀其死念
昔賢哲人一一去爲鬼詩書捐篋笥采采當路子採藻
厠明庭幸與君子同矧在弱冠年已獲承其風家本聖
門後孝友世所隆何意手足親一別曠音容及我南歸

日舟楫復相從
皜皜寒日高冥冥
厲征鴻落帆滄江際
渺然忽西東
努力慎所託
無爲謬勞躬

寄題臨川西澗范氏寓居

蟾塘塘更西
幽澗總堪題
流水花間住
孤禽竹裏啼
石稜苔自合
山徑樹相齊
久客成真隱
故園應已迷

尋舍弟將至東牢宿野店

歲暮尋吾弟
山行兩舍餘
入雲攀磴道
落日及村墟
茅店溪邊冷
松林石上疎
如逢武陵客
風景未應殊

贈王郎

王郎楚狂士
意氣飛秋霜
讀書一萬卷
下筆數千行
富貴視浮雲
况肯矜文章
十五恥閭里
掉臂辭故鄉
夜宿東海月
朝買西州航
瞋目王公前
結客少年場
一飲或一石
一醉或一觴
寧揖屠狗人
不與俗士當
千金不易笑
歲暮單衣裳
阮籍在窮途
英聲連四方
鸞鵠有時鍛
反愧燕雀翔
世無劇孟交
不及青樓倡
燕趙如花人
翠袂黃金璫
不識豪俊士
空媚癡與狂
王郎遠過我
坐我枯藜床
終夕無酒飲
撫髀歌慨慷
平明別我去
極目空茫茫

沈逸人東觀招飲山館
野館青山下晴軒積雨餘
招尋蒙遠客寂寞愧間居
空翠沾盃冷殘雲度谷虛
從茲結朋好隨處問何如

畫鴨

春草細還生春雛養漸成
茸茸毛色起應解自呼名

題聶氏陶軒

開軒南山下日對南山雲
青松俯前楹秋菊被中園
翳翳修竹林清泉出其間
歲晏農務息銜盃樂餘閒
時從隣曲游其稱稼穡難
達人貴知己俗士多所牽
以茲謝

簪紱委心此南軒
列植旣敷榮佳興日以繁
讀書教兒子餘事焉足言

送涂雲章訪舊武昌卻入京師

垂雲厲驚風萬里摩高圓
蟠泥鼓巨浪豈顧九重淵
毛生入楚庭穎脫俄頃間
粲粲一公子長嘯起邱樊
朝辭豫章臺暮過匡廬山大
帆割鸚鵡極目空波瀾黃鵠
錦袍仙吹笙紫霞端相顧一
笑粲青春滿南天黃金築高
臺更覺郭隗賢聯翩樂劇輩
相逐入幽燕平明九門開
劍佩踰五千豈無一字薦
傾倒平生言東風杏花開待

我薊門前

歸舟

汀洲春草徧風雨獨歸時
大舸中流下青山兩岸移
啼木郎廟人祭水神祠
波浪爭掀舞艱難久自知

小孤山曉發和蔡思敬韻

日落霞明錦浪翻
厓傾石峭白雲間
乾坤上下雄孤柱
瓜蜀東南壯此關
神物夜移風動地
仙舟曉度月漫山
回瞻絕頂登臨處
空翠冥濛杳靄間

大信晚泊呈舟中諸公

千家楊柳江當門
東梁西梁兩岸蹲
連檣大艦集日昏
縱金伐鼓海上聞
小江更出采石後
前人立功後人守
大信花采石酒陌上
相逢莫迴首

白楊河看月

白楊河上看明月
昔人曾見今人別
茅屋數家河上村
化作三山白銀闕
波平風靜棹歌來
萬頃沖融鏡面開
今夜江南憶遊子
空瞻雲漢上昭回
茫茫萬里燕齊路
北斗從橫泰階曙
黃河東逝月西流
明日南風過洪去

歌風臺和李提舉韻

萬乘東歸火德開漢皇曾此宴高臺沛中父老謳歌入
海內英雄倒載回湯沐空餘清泗在風雲猶是翠華來
穹碑立斷蒼烟上靜閱人間幾劫灰

題嚴陵獨釣圖

何事元纁入里閭羊裘暫脫就安車空令太史驚同寢
猶把狂奴視報書一出聊爲天子重諸公莫道故人疎
朝廷自足中興士且放桐江著老叟

題鼯鼠食瓜圖

種瓜中園予亦勤止瓜長而實汝則殘止雖則殘止予

敢汝仇天實汝生予將何仇汝食之甘旣肆旣閑實之
食矣無傷予根根存而微惟予之窮根盛而實惟乃之
功

坐信州僊源觀徐尊師乃元教大宗師張開府之

弟子也

元霜搗罷世都遺葛屨蕉衫太古姿天上真人開府日
山中僊子閉門時空林雨過金芝老深谷雲寒白鶴飢
萬里馳書爲永別盧敖何處定相期

送蔡思敬還豫章有懷遼陽李提舉

來日能同去不同獨攜別恨向秋風眼看亂葉渾無定
心與浮雲併一空黃獨山中歸自斲玉梅溪上夢先通
莫喚畱滯京華者更有遼陽送斷鴻

孔林圖詩

集賢待制周侯能修禮于孔林侍讀學士商公
圖之史官揭傒斯詩之

峩峩尼山蔽于魯邦篤生聖人維民之綱尼山之下有
洙有泗有蔚孔林在泗之浹維彼聖人教之誘之凡厥
有民則而倣之維彼聖人覆之載之凡厥有民敬而愛

之既誦其言亦被其服孰秣其馬于林之側既誦其言
亦履其武孰秣其馬于林之下六轡既同周侯之東薦
之侑之聖人之宮其音洋洋其趨踰踰其臨皇皇聖人
允臧商氏圖之式昭其敬載瞻載思罔不由聖

壽櫟山詩一首為吳真人生朝作壽櫟山其里山
名

峩峩壽櫟山瀕洞雲錦溪百里空翠合諸峯南斗齊卧
斲月窟桂坐聽搏桑雞臨深測地軸升高徑天倪陰厓
覆瓊藥陽岡敷紫萸縣泉聒空響飛樹凌風嘶側畏援

鳥墮幽恐漁人迷茲山不自高與人作丹梯赤松棲其
東王喬憇其西浮邱前捧擁安期後提攜神君領天官
出入黃金閨梅花照羽袂天書函紫泥歸期指松櫟千
歲猶未稽餐和養靈源伏智掃荒蹊木公與金母大笑
彭鏗低

壽王副樞

七袞懸車兩府稀五朝遺老百僚師寒梅看足行唵處
舊史評來坐歎時身退已將心共遠名高轉覺世堪遺
且陪嘉客霑春酒政待武公歌抑詩

李將軍歌一首送李天民赴邵武軍口巡檢

李將軍材且武儒冠換得兜鍪去身疑南極老人星氣
食陰山雪毛虎雕弧白馬金僕姑天地昂昂此丈夫五
十方為求盜使人生何用苦詩書寄言邵武諸官長不
是尋常一腐儒時中書以吏部儒選員多有十年不得
調者奏以為閩廣諸道巡檢然多非其
人而天民式稱是選
老人星其常自喻

題桃源圖

江左龍虎山南十里有桃源者劉王二尊師所
闢也臨江范亨父為之記余為賦五言詩十七

韻

桃源非一處龍虎畫難同內外關踰鐵高低石作叢黃
旛青劍北紫葢白雲東蟾影當霄迴蛾眉抱月弓六峯名
千重藏曲折四面削虛空地戶吟風黑天池浴日紅雪
霜翻濺瀑雷雨瀉崩洪暗識猿啼遠晴聞鳥語工危龕
三井秘絕澗九橋通江合仙巖怒山連鬼谷雄劉王開
關後秦晉有無中時見看桃侶頻逢採藥翁丹臺寒漠
漠琳宇氣熊熊濟勝非無具緣源恐莫窮烟霞俄變滅
草樹杳龍葱四序何勞誌羣愚倘擊蒙誰言武陵近十

里上清宮

送人歸豫章

積雨霽徂夏故人今日歸手持毛生檄身着萊公衣玉
樹挂秋月丹莢揚曉暉東湖徐孺子應怪久相違

送王畱守宣慰荆湖

舟楫連檣出薊邱弓刀千騎入荊州歌翻郢雪寒暄變
恩逐岷波日夜流雲雨暝連神女宅山川晴繞仲宣樓
豈無賢士堪招隱應向鹿門深處求

題張尊師畫

晨登翠微天氣穆清白雲覆谷飛露垂纓孤後遠響衆
鳥嚶鳴牽蘿涉澗穿石度陁半巖華氣萬壑松聲神宮
漠漠靈戶熒熒投陰迹影叩寂求膺素髮老人笑而相
迎弗問弗承悟彼長生元玉流液瑤草結英浩浩奔泉
出與川平宛彼下人望我巖扃

送播州楊宣慰歸藩

祇奉綸言出夜郎恭陳壤奠入明光嘉名宜賜黃麾外
大宴恩陪玉座傍天仗影移低日月宮懸聲動下鸞皇
三呼拜舞君王德永共藩臣守四方

又

雙旌遙指洞庭西十乘聯翩度五溪龍虎親軍兼使節
犬狼諸獠入封提光昭廟祐恩波遠風動藩維禮秩躋
北望五雲高魏闕亦知憂顧在黔黎

寄題柘蒼王氏東野二亭

畊雨

時雨布嘉澤羣物盡欣豫晨興集童僕東野從所務鵠
鷄應候鳴鸚黃翔高樹衆草萋以出流潦被行路甬勉
勤微躬寧復當世慮義農不我侍沮溺諧所慕食力隨

齊民常恐負空素眷言徇茲道卒此年歲莫

心遠

窮居豈余志無營得長閒翳翳三畝宅顧樂彼南山灌
木何蒼蒼雲鳥相往還已絕嬰世念况接仁里歡但願
黍稌登春酒恆慰顏羲和緩其轡萬物悠然安

寒夜作

疎星凍霜空流月濕林薄虛館人不眠時聞一葉落

送唐尊師祠武當

龍袞分香下絳霄羽衣承詔出清朝星臨翼軫南垂濶

神降虛危北極遙金殿壓雲開紫氣玉臺和月合笙簫
蕃釐更爲吾皇祝下國時豐雨露饒

送詹尊師歸廬山

香爐峰色紫生烟一入京華路杳然雲碓秋閒春藥水
雨犁春卧種芝田書憑海鶴來時寄劍自潭蛟去後懸
忽報歸期驚倦客獨淹微祿負中年

贈淳真子

蕩蕩白玉京超超淳真子十一求神仙服事邱與李嵩
洛二十載結茅白雲裏餐是暘谷霞飲是玉池水鬼神

莫能識百念吹不起一朝忽騰化徑去不可遮飛駟服
五龍角巾搖三花朝發扶桑國暮宿河漢槎朝食千歲
桃暮食五色瓜長揖青牛君高歌渡流沙還憇金陵邸
調笑許史家日食五侯鯖安得厭胡麻春風長安陌落
日邯鄲道迎人上青天送人入秋草竦身入極外天地
忽亦老寄謝區中人全真以爲寶

孤松篇壽王大學士

大地凍欲裂孤松高穆清橫睨泰華嵩俯察蓬與瀛天
風四浩蕩身與元氣并根深本自固霜雪空崢嶸白晝

甘露降半夜朝陽升飛枝蔭扶桑勁氣摩欒槍羣鳳所
託命百鳥徒嘲鳴冥冥廣寒宮丹桂亦虛生八萬四千
人何時月常盈維此天一柱千歲所養成自非堯舜君
工垂焉敢徵漢武作建章千門照西京掄材當此時餘
柯了棟楹天地既有此未必終無情蒼蒼歲寒心永世
仰堅貞

過何得之先生故居 五首

可憐古井門外依舊鐘樓屋西何處高唸痛飲黃華翠

竹都迷

先生有詩云一井當門凍寒光照
四隣又我住東街北鐘樓在屋西

又

心事巢由以上文章陶阮之間千古高墳保下白雲明
月青山

又

軋軋機聲日莫依依楊柳春柔膝下中郎小女曾聽唱

我高郵

先生常喜余高郵城詩相見即呼高郵城來每相對酒酣則朗誦數過

又

頭上烏紗分贈篋中縞楮相醺不道別時長別誰知愁

是真愁

延祐五年冬十月余南歸以巾材一段見贈予以白楮被報之別時殊黯然也且手書其三代

名字授予若有所屬然也

又

屋上青天未老門前白日常新他日咎夔稷尚安知不
是斯人

送譚仲章歸長沙

君家雲陽下忽向雲陽歸行路有南北看山無是非三
湘迴雁盡孤劍白虹飛亦欲投簪去從君采蕨薇

我我亭詩

殷仲堪答桓温曰我與我周旋久寧作我宜春

黃元瑜取以名其亭曰我我為賦詩一首

我游于袁于龍之干有關閉閉有環言言有構桓桓維
集之安我居我處我笑我語有翼其所而敢予侮我植
孔嘉我構孔華會莫之迎而莫我多彼馳者子亦孔勞
矣既我覲矣亦莫我速矣嗟殷氏之老猶弗桓是友我
不我友將誰歸咎温温其和瀏瀏其清藹藹其芳煥煥
其明嗟維古之人尙或予聽

送鄭司獄歸衢州却赴調京師

壯年執戟事明君一日上書天下聞不恨棲遲百僚底

猶堪激烈萬人羣爛柯山遠迥孤棹析木天清望五雲
盡說于公有陰德掉頭相別大江濱

題山水

野艇來無數山橋度有三寒雲依古寺落木帶羸驂迥
首重重變幽尋處處堪平生雙眼力江北復江南

題御馬圖

朱纓金絡轡黃帕錦鞍韉神閑意更逸初下赤墀前

題山暉圖為劉尊師作

陵岑毓神秀草木咸光晶每覽靈景異變態如有情閃

掩乍如羃飄浮忽相縈熊熊轉空曲奕奕連增城中有
幽人居燕坐朝玉京窮陰亦朝徹無月恆夜明碧桃千
歲花金芝四時榮猶疑地愛寶隨物弄華英

題臨江同知問流民事蹟

江北流民七十口三十餘年在江表朋凶結惡四百餘
白刃差差厯村保崩騰所向如投空白晝攫金都市中
頃由南昌入豐邑反賂守者爲先容長官坐堂寇入室
妻子莫逃况金帛豈無鄉民敢相敵長官一揮翻辟易
臨江貳守廉且武手縛其渠散其伍豈惟鄉民得安堵

鄰境聞之皆鼓舞其渠在獄伍放歸大府上功民俗熙
乃知一念敬厥職萬事至難皆可爲人民社稷我所有
安得坐視如雞狗人在雞狗猶愛之民社豈在雞狗後
請君看取臨江守

寄題朱氏真村堂

深居魏亭北悃幅自無華風俗似太古生涯如小家飲
醇猶恐過衣帛尙疑奢相與鄰人異詩書有五車

送人從軍

妙年好文仍好武一旦從軍氣如虎彎弓已作滿月圓

拔劍更逐迴風舞悲笳四起旌旆愁蒼山偃蹇黃雲浮
陣前手繫降王頸馬上仍懸猛將頭復誓義大身命小
順天將軍古來少一戰功成六合清不用黃金印如斗

題淵明歸去來圖

清江皮使君治南恩有惠政一日自免去而歸

老焉廬陵王實初賞其高節以淵明歸去來圖

求中朝學士大夫賦詩還以爲壽僕用其意賦

五言一首

吏事久見牽山澤曠游盤茲辰理還策乃得從所歡悠

悠川塗迴忽已造郊園風景一不異鄰曲皆奮觀童稚
識人情奔走向我前荒草雖誕漫松菊了不干睠焉循
初服常恐負昔言入室多美酒步庭嘉樹繁曠然心神
舒誰謂世路艱出處各有道既倦當知還方春農事興
念之每忘餐貴賤豈不殊樂此農圃安堯舜垂衣裳巢
許箕穎間漢祖除暴秦黃綺在商顏彼皆賢達士今古
胡不然永與簪組辭婆娑養餘年昔聞陶彭澤今見皮
南恩千歲仰高軌茲圖良足歎

揭曼碩詩卷二終

番禺孟鴻光校

揭曼碩詩卷三

題明皇出遊圖應制

虞山 毛晉子晉訂

明皇入駿爭馳道還是開元是天寶
長安花發萬年枝不識韶華醉中老
奎章閣下文書靜袞衣高拱唐虞聖
莫言此畫徒爾為千載君王作金鏡

送孔學文赴大庾巡檢

三孔諸孫紫綺袍俄辭俎豆事弓刀
舟行揚子金山淺路入梅華庾嶺高
正為凶年憂盜賊仍嗟微祿誤英髦

乘田委吏唯求稱一命猶堪愧彼曹

送李都事赴湖廣省幕

堂堂李通甫起家掌邦憲直氣橫九秋神明激雷電再
登蘭臺上愛國心靡轉時當至治未有位日兢戰崩騰
五華山鑿翠起臺殿執筆佐御史力諫明且辨斧質已
在前獨立目不暇駭尋國多故災異周八埏君復贊宣
政赤手握銓選守法踰天宮反得官長怨我皇奮江漢
撥亂啟天眷乾坤再開闢日月重昭絢磊落收羣材疎
戚共登薦君名一朝起亦作丞相掾丹心益傾竭婉畫

勤替獻好惡古難同禍福巧相禪天子憂南紀藩宣必
時彥下逮曹屬微簡選亦精練君得南省佐聞者盡驚
羨偃僂辭闕庭飄搖出畿甸餞送盈路衢懇款陳志願
去年天下旱窮蹙無貴賤賑卹當及時本末須竝見方
春農事興不廢乃爲善又聞南中賊憑陵及州縣黎獠
本吾民撫綏在方面恩信足以懷逼迫使生變况我聖
天子轍迹昔所徧勗哉籌策良無使空蹂踐京城雨初
過草樹鬱蔥舊喬木多蚤鴛高堂有新燕煩辭君勿誚
君歌我其抃

畫鷹

文梁五色條秋高意氣豪怒張兩目直霄漢豈與短翮
翔蓬蒿妖狐畫作猛虎嗥騶虞并與神麟逃嗟爾飽食
心空勞

題張使君棄官學道詩卷

至元天子朝萬國任邱使君謝病歸門前未罷車馬客
身上已著朝真衣致君堯舜在豪傑洗耳巢由是何非
棲雲觀裏青松樹唯有白雲終日飛

送戶曹掾于孔昭赴南臺掾

于君高材世難遇東曹未滿南臺去風雲在足那得辭
天地生人豈無故乃翁十年佐臺省一心用法惟平恕
君今豈必求多聞過庭一一皆可度南臺所臨十憲府
可詰寧惟在臧汙五方之俗有淳漓萬事無憑生愛惡
莫令水鏡惑妍醜長使陽春伏霜露扶綱樹紀須自治
護惡含姦適爲蠹况當海內歲大侵父子相殘莫之顧
郡縣非無賢守宰貪卽爲能廉卽如願君努力事匡贊
臺端鶚立皆碩輔多言欲悔已莫追白髮蕭蕭歲年暮

寄題胡氏園趣亭

日與世情遠學人聊治生畦蔬多品類樹果各生成野
老過偏數山禽近不驚詩書吾所好農圃也須明

題文瑞圖

常德之龍陽居多蜀士祠事梓潼君甚嚴祠前
有池曰景星咸淳癸酉蓮兩葉竝蒂者六劉初
登進士第延祐甲寅兩花竝蒂孫以忠登第天
曆己巳華如甲寅城東三雅湖蓮復三華竝蒂
海魯丁獲獨步丁馮天澤聯貢而獲獨步丁登
第好事者寫以爲圖邀余賦詩

蓮華復蓮葉竝蒂更連莖竝葉已不見三花兩花更有
情如何與人作佳瑞偏向龍陽水底生龍陽家事梓潼
君華華葉葉梓潼神好語龍陽士汝但讀書更績文爲
華爲葉汝莫論

題南頓孔氏復明詩卷

失明非有故復明還自然方其失明時萬事俱棄捐外
雖無所睹內則常淵淵如未嘗有目不喜亦不憐知明
入地中明未嘗不全逍遙天地內如在天地先不助亦
不忘一氣自周旋不敢計此生敢計時序遷剝乃復之

始自坤還至乾忽如浮雲散還我蒼蒼天昔非果失之
今亦固有焉如何孔氏家母子仁且賢先後俱失明其
復皆十年十者數之終如月晦必圓養之苟有道何疾
非所痊願言永保之母或忽此篇

奉同柯博士甘內掾下直賦

暮出閭闔門解鞍坐前庭泠泠草露白華月隔林生蟀
蟋奮哀響鴻雁流遺聲常恐芳景晏不知寒節并萬物
肅將斂孤懷徒自盈捉衿激長謠淒烟諒難聽

賦得海上雲送良上人歸徑山

蕩蕩無邊涯悠悠何所之孤飛若有意羣往更無疑稍
拂搏桑樹還經若木枝迎陽成五色乘陰忽四垂作態
離仍合多情去卻追因風過別島和月下蓬池且任從
龍去寧知到岸時惟應學空者澹泊與相期

吳子高悼亡歸岳陽

都門落葉滿遊子去京畿忍聽離鸞操遙逐秋鴻飛愁
霜曉入鏡淚雨夕沾衣烟樹黃河岸風帆采石磯平沙
迴渺漫寒雨暖熹微客心閑轉切鄉書近却稀夢聞兒
女泣行將童僕依竊慕漆園放誰云潘岳非乘濤慣不

險迴江望若圍武昌未易到更向岳陽歸

秋夜作

露下氣逾肅月高寒欲流落葉階前樹疎鐘城北樓衰
年對急景歸心臨莫秋當世非無意才薄徒淹留

進士張子高得邛州判官歸成都

邛竹山前負弩迎去年曾是一書生天寒劍閣猶車馬
雪滿繩橋正甲兵卽恐徵求民力竭莫將憂患客心并
六千餘里關河路不盡深期遠別情

題陶淵明歸興圖

家貧無酒飲聊欲試弦歌去家百餘里邈若異山河江
上日多風浩浩冰增波門前五柳樹繁蔭空婆婆林田
已收成歸計當如何

寄題傅尊師兄弟所作寧壽道院

鍾榮之山千萬峰琵琶塵湖相疊重雨翁入谷起臺殿
半夜空山聞鼓鐘猛虎如逢澗邊石飛龍却是雲間松
黃庭書罷人難見鴻寶披殘手自封度壑采芝隨鹿跡
登厓望日躡雲蹤已知塵世惟堪笑不是神人定少逢
辟穀有方桃更美圍碁無地橘相容但餘一念封人祝

未與人間萬事慵

二月朔日雪中題歐陽少監所藏宋好古畫竹
農朝下延閣貽我翠琅玕微霜著節勁細霧入林寒欹
枝偏稱遠歷葉更宜攢孤石覆逾潤橫坡晴不乾况茲
春雪裏相對五雲端誤當裁汗簡誰擬截漁竿惟應湘
浦上歸共幽人觀

雲錦溪棹歌七首

雲錦溪中雲錦鮮好在高秋八月天西蜀錦江那得似
西湖綠水更須憐

又

纔過浮石是藍溪溪上青山高復低山中泉是溪中水
每源直到華山西

又

藍溪南去到藍洲水底嶄嶄石不流迴望朱宮雲霧裏
白雲深處更高樓

又

官前梨浦白茫茫岸上人家不似墻能到此中還有幾
行人莫厭棹歌長

又

楊金橋望玉真臺臺下橋頭人往來崇文宮裏看華去
安仁縣裏賣薪回

又

挹僊亭下薛公橋紛紛抵暮更連朝唯有橋西楊與柳
無情長繫木蘭橈

又

溪上層層雲錦山垂楊盡處是龍灘不是孤舟來逆上
何人知道世途難

御書雪林二字賜趙中丞應制

聖主揮毫臨秘閣親臣執法坐崇臺祥雲五色從天下
彩鳳雙飛映日來政欲清如林上雪已聞聲奮地中雷
君臣千載明良會咫尺薇垣接上台

題胡虔汲水蕃部圖應制

沙磧茫茫塞草平沙泉下馬滿囊盛會於王會圖中見
真向天山雪外行聖德只今包宇宙邊庭隨處樂農畊
生綃半幅唐人筆畱與君王駐遠情

題辛澄蓮華觀音像應制

至人不可測宴坐青蓮華珠纓被玉體白豪貫彤霞從
何得此相來置玉皇家
杜節婦詩
結髮事夫子白首以相期諸宴方婉變生死遽分離室
中無長男堂上無老姑生計日蕭條誰分心不渝良馬
不亂羣仁鳥不亂行昔者爲夫婦今忍遂相忘生爲董
家女死作杜家婦安能若流水東流復西注春秋陳時
祀蘋藻宿所供一朝祭無主焉得不忡忡灼灼庭中花
落落俱爲實賤妾在空閨志願從此舉

題內府畫四首應制

韓滉土星像

五行土居中百獸牛有功土行降爲神騎牛髮翁翁有
土復有牛惟神賜年豐遙知韓滉意政與星心同

曹將軍下槽馬圖

曹霸畫馬真是馬宛頸相摩槽櫪下卓犖權奇果如此
豈有世上無知者朱絲不是凡馬韁天閑十二皆龍驤
會從天子平四方畫圖仿佛餘驪黃華山之陽春草長

韓幹馬

韓幹畫出曹將軍幹惟畫肉尤逼真昂藏四顧欲飛去
老矣安知馬有神想當此馬未畫時朝刷吳越暮燕秦
頓轡長鳴風動地不數驂騮與騏驎當時用舍那知許
粉墨蕭條尚雄武千金駿骨何足論萬世長留羣玉府
宋徽宗成平殿曲宴蔡京圖御畫御記

送秘書李道濟赴峽州幕

蓬萊道山芸閣裏赤甲白鹽蓮幕中十載同朝君獨去
三年佐政我難同大河水滿中宵雨鉅野樹涼清曉風
夷陵江頭幾日到迎親應先南飛鴻

奉送全平章赴江西

聖主思南土明公起集賢直期凋瘵後共致太平年金
虎分符重文龍賜服鮮權綱兼將相標格近神仙天地
三江外星辰北極邊丹心齊出處素志在陶甄請述江
南事都非大德全但徼扶弱美竟坐抑強偏無復同憂
樂徒令舞智權平疇吹渤澥暗室伏戈鋌貪黷明相訓

忠良默自憐民心隨日壞世態與時遷况復兵饑接仍
聞疫癘纏誅求殊未已蝨賊轉相挺若擬寬憂顧先須
解倒懸久飢寧擇食多病但求痊一語堪懲勸微機足
轉旋已知平似水更道直于弦遙想聞公至渾如望歲
然九重天上別百丈霧中牽日月明金節山河入畫船
四方初息馬五月正鳴蟬豐樂田多黍生香爍有蓮岱
宗標魯地廬嶽壓湖水恠收崩浪山靈掃瘴烟歡呼
麟鳳出踴躍吏民先笳鼓趨雄鎮旌旗覆廣川下車和
氣應袖手頌聲延膏雨侵淮甸仁風扇海壖忠貞真世

篤調燮有家傳赤子皆同體蒼生且息肩龔黃須警策
方召在蕃宣

題青山白雲圖

蕭寥青山曉迢遞白雲生衆樹春已暗高原人未畊方
思看桃去復擬采苓行深谷無機事白髮枕松聲

桃華鸚鵡

嶺外經年別花前得意飛客來呼每慣主愛食偏肥才
子憐紅紫佳人學綠衣狸奴亦可怕莫自戀芳菲

趙孝子

廬陵趙孝子四歲父行賈一去三十年家惟大母母大
母已云沒而父行不歸兒長亦有婦母子聊相依從父
自北來汝父久已死母子哭且問父死何鄉里聞汝父
死時不知汝父處汝但欲往問京師多舊故再拜別阿
母行多至京師自念不見父兒死無歸時乃有曾老者
往昔與父善言汝父死處濱州利津縣徒跣二千里薄
言至利津朱琪張文輩一一陳所因死以某年月葬以
某木棺姓名某所題近在城南端城南冢纍纍然榛
莽中極目千萬冢誰能識其蹤行哭七日餘欲死不得

所生者無由知死者豈能語解髮繫馬鞍負之墳墳過
吾父倘有知髮解鞍自墮俄至一墳前鞍墮髮自解開
墳見前和題字宛猶在既見父姓名痛絕心始安函骨
陳野祭禽鳥聲爲酸隣老四面來驚歎未會有相帥報
縣官縣官駭之久卽日上大府大府咸異之次第聞中
朝行子正南馳行子行且傷哭踴如初喪路遙山川阻
何時至故鄉故鄉旣云至塋祭無遲禮母子永不離萬
事若流水聞者盡稱孝見者皆感泣期爾百世昌望爾
百祿集兒今一無願願母長不老歲歲父墳前灑飯墳

上草

題姑蘇陸友仁所藏衛青印

白玉蟠螭小篆文姓名識得衛將軍
衛將軍今何在白草茫茫古時塞
將軍功業漢山河江南陸郎古意多

廬山連尊師求真陽詩久諾而未作也
一夕夢中得之因書以贈

稽天之浸不可滅焦石之烈不可絕
香爐峯頭按羽節滿山桃華滿湖月

贈項鍊師

吾聞有一士邈在吳越間騎虎滄海上
茹芝天台山年約四十餘七星布其冠
燕趙雖曠絕倏忽一往還樵子常見之
徑去不可攀又聞好賣藥往往在市闌
疾者得寸七立欲生羽翰吾常慕其人
只尺限河關道書讀萬過不如一承顏
弱志揜昏氣卑卑逐王官何爲浪自苦
食息于人寰

送鄉人祐上人從師歸當陽

學道玉泉寺從師天子都流年春事半
歸路客帆孤山勢遙連蜀江聲不入吳
故園如可到種芋有遺區

抄長石言卷三
送蘇尊師歸茅山
華陽隱居者聞復有蘇仙時向梅花下高枕石頭眠劍
匣出飛電琴心流暗泉閑來京闕下夜夜夢雲邊

寄題張齊公廟

東安猛將張齊公十八奪父軍囚中至元召募起亡命
父子南伐收奇功酒酣一躍馬上立拔劍四顧奔雷風
十年轉戰江漢上萬里直挽安南弓乾清坤夷四海一
勲在旂常心帝室身封萬戶傳子孫誓不偷生汙天秩
天下豐盛大德年天子明聖宰相賢小臣劉深射功利

上疏自薦能開邊鬼方寡婦號八百嫂叔操戈自爭國
劉深一言取大官遠帥官軍陵險阨五溪運糧數萬家
哭聲震動湖南北發徒開道徑折節旣勤其民大求索
斗量金珠谷量馬谿壑之欲安可塞此時張公亦在行
捐軀力諫皆莫克折節薄險伏四起劉深夜遁張公死
鳥飛不度山川愁坐看英雄化爲鬼乃知自古守邊鄙
大忌邀功貴寧救張公廟食東海頭劉深梟首蠻烟裏
張公世爲忠孝門劉深萬年穢青史兩家同死不同心
試與題詩作臣軌

題李安中白翎雀

白翎雀白翎雀每見灤河河上飛平生未識百禽性不敢籠向江南歸

寄題楊教授菊莊

歸人種菊處乃在東海涯幽香發清真正色間奇葩百種猶未愜千株寧足多寒分石橋月晴通赤城霞特起表陰卍羅生騁陽阿門巷掩蒿萊荒徑絕經過飲露咀其英孰知年歲遐

番禺蕭性淵攜其祖將領所愛唐琴號霜鍾者還

自和林求詩六月三日五門宣赦後作

嵩州昔有蕭將軍讀書學劍天下聞南隨龍馬渡江去尚有孤琴傳子孫孤琴云是唐人斲昔日軍中自行樂至今猶存殺伐聲一鼓哀風振寥廓將軍之孫才且良文能作賦武蹶張秦皇城下飲白馬祁連山中射白狼時平好文不好武抱琴却歎儒衣誤昭王臺上看青春彭郎磯頭夢歸路日長史館幽且閒正冠拂琴爲我彈京城六月日如火霜鍾半夜鳴空山南風自有虞廷操可惜同心不同調捐琴決眼望青天今日天門有新詔

送王伯循編修赴南臺御史

朝辭禁苑暮南臺
驄馬翩翩道路開
佐邑已知爲治最
經邦正賴濟時才
人情好惡非相遠
民力凋殘實可哀
鵬鷄秋天須搏擊
郊原恐有鳳麟來

寄題鄴下樊氏鍾秀園

鄴都雄地理樊氏好園林
庭戶花陰合池臺樹色深
佳時惟飲酒永日自彈琴
車馬如相訪流泉可洗心

題廖氏皆春堂

時清日月明心和寒暑平
東風扇萬物花間語流鶯農

興水泉動蠶起桑柘榮
牛羊被原隰麟鳳在郊坰
少者擊壤歌老者鼓腹行
不知天壤內何物異吾生
常願天子聖四海無苛征
夔龍滿廊廟蕭韶歌九成

大駕旣幸上都率奎章諸生之留京者讀書宮南
史館中得大熱疾勢危甚項君子虛視之一藥
而起爲賦五言一首爲謝

天台項子虛乃是列仙儔
賣藥都市中疑是韓伯休
欲見不可得不見忽相求
神清骨秀聳蒼松倚丹邱
又如霜空月下照千丈
流時有揭子者卧病城南陬
馳往施

寸七大暑生清秋人言死復生仰視行雲浮長揖忽不見思之生白頭

周氏敖山驛水木清華亭

周家亭子敖山上斷隴連岡紫翠開晴日捲簾幽鳥下微風倚柱白雲來松間漁艇時俱放竹外樵歌晚獨回咫尺紅塵車馬地已如弱水限蓬萊

題趙照磨虛舟

剝木作孤舟乘風到處遊寧求觸無怒政用載能浮歸其唯明月行隨只白鷗浩然江海上何懼復何憂

送毛真人還龍虎山

手綰銀章主秘祠翩然歸去忽如遺塵湖龍井雲間上鳳曲鸞歌月下歛香逐蘅薇深更入氣交梨棗靜偏宜南屏風雨平坡雪爭似山中夢覺時南屏山在上都南七十里歲扈從至上都夏秋居焉平坡在大都西四十里西山之上冬春居焉蓋皆所掌秘祠所在故中憲大夫嶺北行省左右司郎中蘇公志道哀

詩

蘇公廊廟姿推擇起爲吏論議動引經舉措必由義惟時方大旱謂咎在寃滯決獄天乃雨凶年化豐歲流聲

滿山西憲府立羅致慷慨平生懷遂佐直指使受命按
邊鄙正色行使事邊臣既威服使亦免顛躓六曹收雄
材兩府資遠器激昂天下事往往見謀議十載拘掾曹
彌年困文字雖云富匡贊豈足盡材藝一命厠省僚勾
稽得深弊銓選班爵冗出入錢穀細竝緣出多門穿冗
肆姦利有如水上市驅去還復至因風一披蕩覓得免
蒙翳再命主賊曹持平獨丕蔽恆求情中實動究法外
意功罪必誅賞善惡俱惕厲三二命參宥密令聞益昭晰
和林跨大漠肇造此根柢東際瀚海頭西控流沙裔北

窮陰山外南倚兩都勢連營列萬里倉庾千萬計鎮以
磐石宗重以分省寄憶昔大德未成廟方厭世桓桓忠
獻王功大更多智武皇旣踐阼宮闕始清闕越邸矜微
勞寵極心乃異國有社稷臣讒乃惑聰睿遂輟股肱任
往重藩屏繫有威如雷霆有恩若元氣畊鑿比中土什
五相錯置士忘遠戍苦民見太平治道路無拾遺商旅
畢懷惠忠獻一朝沒武皇亦遐棄駸尋延祐中權相擢
天位磨牙吮人血掉尾恣狂獠戕賊骨肉親迫逐見危
墜天人共震怒降災及茲地大雪深丈餘人馬相枕斃

重爲朝廷憂夙夜靡寧志除吏超五等聞者盡驚避蘇
公拜郎中卽日辭九陞厚祿非所榮高爵非所貴彼民
亦天民安得皆坐視兼程到官所發廩急周濟死者何
嗟及存者再生遂閭閻漸蘇息竭力補黥劓飛書九重
天請爲兵民備募粟實塞下慎勿憚勞費天子賜問勞
名王致金幣至今賴長策當時已多忌如何方賜環及
國竟長逝都人走相哭行子爲歔歔崩騰朔風迅慘澹
浮雲曳蒼松拔其根黃鵠綴其翅幸哉有令子名已注
簡記千秋常山下豪傑一揮涕

題羅稚川所畫臨川羅益謙溪居圖

迢遶臨川郡泱漭元獻里溪上君子廬閉戶青林裏連
山烟景晏斷岸寒沙靡日暮孤舟還荒村隔流水

寄題武寬則湖山堂

祝融九千七百丈六月飛雪灑洞庭攸輿學者武寬則
石鼓齋中窮六經氣橫瀟湘波浪白思入嵩華烟雲青
四千餘里到京國倒插五色鳳皇翎河西猛將今太尉
一見握手坐廣庭立呼愛子俾受業豈獨汝學我亦聽
猿肩虎頭日侍側長刀大劍羅青熒動陳忠義破肝膽

衆目睽睽開心局丈夫乖遇豈偶爾縱不我聽我則寧
嗟予官冷材力薄每辱奇俊哀矜踬天晴風靜輒過我
如病得瘥醉得醒不爲湖山勞夢寐不爲富貴疲心形
始知卓識出天性豈彼狗苟蠅營營方今夔臯滿廊廟
洪恩^星叟降無濫刑長材用世何不可大夫列卿如拾瑩
君如得位立行志慎勿學我空星星我今老矣何所稱
白雲深谷寒烟汀

十月十八日夜南郊齋宿夢先帝召見便殿手賜
橘花一枝有感而作

淚盡烏號不可攀傳宣忽降白雲間人華拜舞君王賜
夢斷齋廬月滿壇

寄題上饒鄭氏菊莊

上饒多隱者鄭氏善爲方移居倪陽里種菊今成莊近
取徧吳楚遠求至帝鄉品類百十餘顏色不可常漑以
玉井泉樊以柳與楊晨興卽造之不憂露沾裳有時忘
飢渴餐之以爲糧門無催租吏家有白玉郎華前撫鳴
琴華下列壺觴興至輒痛飲飲罷卧其傍自謂得菊趣
不知與菊忘但恐秋景晏繁露結爲霜益盛虛室中虛

室仍面陽重簾護夕氣疎牖逗朝光亂以青青蒲水石
儼成行重得隱者心不辱桃李場玩物焉足計歲晚託
餘芳

題四清圖

一清曰王右軍平生富事業獨以能書聞遂令吳越士
至今學者猶紛紛于嗟乎王右軍

又

二清曰軒轅彌明偶然吟石鼎狂怪使人驚遂令韓吏
部至今妄得狂怪名于嗟乎軒轅彌明

又

三清曰玉川子忍窮吟月蝕天高叫欲死獨對烹茶婢
白頭赤脚老無齒于嗟乎玉川子

又

四清曰林和靖周程明聖學韓范輔王政獨對玉梅花
山色湖光耿相映于嗟乎林和靖

題新安許氏蘭秀軒

蘭生兮深谷漱流泉兮蔭嘉木綠葉兮披披玉幹兮紫
蕤植之兮堂下播芳馨兮菲菲菲菲兮揚揚思君子兮

高堂緝琴瑟兮會友嘉有苾兮薦芳襲芳兮佩秀宜君
子兮多壽

夢題墨梅

霜空冥冥江水暮江上梅花千萬樹無端折得一枝歸
一雙蝴蝶相隨飛

寄題永豐劉氏暖翠亭

孤亭萬竹中危坐自生風近與山光合遙連野氣通鳥
啼深不見泉響靜偏聰束帛休相汙先生道未窮

又

雞山俯鷺溪亭子畫堂西流水菱蒲合陽林竹樹齊耕
桑烟外集賓客雨中攜萬事俱塵土詩成手自題

寄題信州德元觀何真人林園長春亭

長春亭榭倚雲開百里湖山入座來流水繞階時自照
好花如幄手親栽青雲每指尋真路白髮頻登望母臺

墓在
前山

題信上人春蘭秋蕙四首

深谷暖雲飛重巖花發時非因采樵者那得外人知

又

孤芳不作榦奕葉自含滋白石蒼苔路落花流水時

又

山深風露冷何處有華開直入雲林去香泂石澗來

又

幽叢不盈尺空谷爲誰芳一徑寒雲色滿林秋露香

蔡七祖真人得朱文公所書讀書二字以名其齋

請賦

今人題扁古人書孔李通家意未疏萬箇猶嫌栽竹晚
百圍曾見種松初黃庭義密從心得白髮身閒對客梳

近有方平消息否紅蓮成碧藕成車

送陰陽蕭教授赴瀏陽

青草茫茫接洞庭瀏陽江上好談經遙瞻紫蓋爲南嶽
仰見長沙是壽星日晏投書招楚客夜闌鼓瑟感湘靈
下簾高坐金錢滿賸買鹽梅寄在廷

賦得春雁送張郎中省覲揚州

東風吹歸雁離離翔天側朝發衡陽浦夕過陰山磧嘹
唳浮雲中萬里才一息眷言思親者相望有南北

送聶太祝赴潮州錄事聶天歷潛邸舊人

三載從容禮樂間，糾曹新拜度梅關。春風忍過金陵道，
夜月重經黃木灣。盜賊數州相應起，甲兵諸道幾時還。
憑君細講安民策，莫遣邊防一日閒。

題俞氏看雨軒

慘澹來何處，崩騰忽滿城。遙連四山黑，近灑半江明。
可愛華間溼，偏宜竹上聲。中宵未可住，高枕寄餘情。

題江道士清虛館

遺紛極元覽，宴坐白玉京。日月朗朝夕，河漢流無聲。
冉冉兩玉童，雙吹紫鸞笙。下視九州浮，以四大瀛萬劫。

猶一瞬逍遙樂泰清

賦得吳歌送人歸吳中

三月酒如澠，高堂絲竹停。繡筵雙鳳影，珠箔亂鶯聲。
疊應紅牙拍，辭傳金縷名。絲雲低不度，芳塵暗自驚。
花發長洲苑，日照闔閭城。且奉千金壽，寧忘萬里情。

捐文安公少時撰功臣列傳，見推於平章李君。晚年以遼金宋三史爲已任，詳論作史之法，未卒業而告殂。會稽楊鍊崖作文偕張伯雨、李孝光輩祭之于孤山之巔，同控天靳斯文之歎，謂史筆不再。

見也至其父子自為師友君臣相為親重及以蠲
俸金一事見德於富州本傳已具載矣海隅毛晉
識

揭曼碩詩卷三終

番禺孟鴻光校

